



IL FURLAN AL JENTRE INTAL CURRICULUM UFICIÂL EUROPEAN


In graciis ae colaborazion fra ARLeF e Union europeane, l'Europass al fevele ancje in marilenghe

Ancje la cognossince de lenghe furlane tant che arme moderne in plui par cjatâ lavôr e par pontâ ae assunzion: e je une oportunitât che cumò si pues vê compilant il curriculum vitae european gjestit de Direzion Istruzion e Culture de Union europeane midiant Europass. Chest sisteme, nassût intal 2012, al à uniformade la compilazion dai curricula par cui che al cîr lavôr o che al vûl promovî lis sôs competencis scolastichis e professionâls dentri de Union Europeane. Cumò, midiant de colaborazion che si è creade tra ARLeF (Agjenzie Regjonâl pe Lenghe Furlane) e Union Europeane,



si podarà sielzi ancje il furlan fra lis lenghis cognossudis. Di fat, di pôcs dîs, tal sît di Europass, cjaland la liste des 29 lenghis che si vierç se si selezione "lenghe mari", si pues selezionâ ancje il furlan.

«Chi in Friûl – al declare William Cisilino, diretôr de ARLeF – la cognossince de lenghe furlane sul puest di vore e pues fâ la difference, massime par meti a comut il client e par agevolâ la



comunicazion. Al vâl pal privât, pensant in particolâr al cumierç e ai esercizis publics, ma ancje pal public, come tal câs dai servizi ospedalîrs. Cun di plui, diviers studis de Universitât dal Friûl a à dimostrât che l'ûs dal furlan in ciertis ativitâts comerciâls al cres il faturât des aziendis».

La azion de ARLeF si zonte al progjet plui ampli dal Portfolio European des Lenghis (PEL), disvilupât dal Program di politiche linguistiche de Union Europeane par sostignî il disvilup de autonomie dal student, dal plurilinguism, de cussience e des competencis interculturâls, in plui che par permeti ai utents di regjistrâ lis lôr competencis linguistiche e la lôr esperience di aprendiment e di ûs des lenghis, su la fonde dal Cuadri European Comun di Riferiment pes lenghis.